

БЕЙБІТШІЛІК МЕКЕНІНДЕ

— Ырыс қайда барасыз?

— Ынтымаққа барамын! — дейді халық әпсанасы. Ежелден бірлікті тірлігінің арқауы еткен қазақ халқы берекенің бастауын ынтымақтан іздеген. Тарихқа шегініс жасап, өткенге көз жүгіртсек, егеменді еліміздің қарыштап дамып, әлемнің алдыңғы қатарлы елдеріне қосылуы да бірлікпен жеткен тұрақтылықтың арқасы.

Татулықпен келісім — адамзаттың асыл құндылықтарының бірі, басты байлығы. Ал, Қазақстан — бейбітшілік мекені. Қазақтың «Бірлік болмай, тірлік болмас» деген аталы сөзін мемлекеттің ұранына айналдырып, қазақ жеріне саяси ахуалдардың салдарынан қоныс тепкен түрлі этнос өкілдерін бір Тудың астына біріктіріп, ынтымақты сақтап, бейбітшіліктің

тұрақтылығын қамтамасыз ету үлкен еңбекті, көрегенділікті талап етеді. Отыз жылдан астам уақыт елдегі жүргізілген сындарлы саясаттың нәтижесінде еліміз соғыссыз, қан-төгіс, қайшылықсыз тыныштық орнаған бейбіт елге айналды. Әрбір қазақстандық өзінің саяси, діни көзқарасына, нәсіліне қарамастан тең құқықта өмір сүріп келеді.

Қазақ халқы қай заманда да ұрпақ қамын бір сәт те ұмытпаған. Еліміздегі әрбір игі бастама болашақ үшін. Өскелең ұрпаққа осы бейбіт жолдан таймау — аманат. Ол үшін әр жас-жеткіншек оқу оқып, білім алуға, халқына қызмет етуге тырысуы қажет. Рухани қаруланған бала ес біліп, ел санатына қосылғаннан кейін, өзінше талап қылып, өмір сүруге қабілетті болады. Жастарды бағыттауда біздің М.Әуе-

зов атындағы Оңтүстік Қазақстан университетінің де үлесі зор.

Біздегі халықтың ынтымақ, бірлігіне, жарастығына тәнті болған шетелдік азаматтар мен саясаткерлердің «Қазақстаннан үйрену керек» деп айтқандарын жиі естиміз. Сондай кезде кеудені қуаныш кернеп, қазақ даласында туғаныңды мақтаным етесің! Елдегі барлық этнос өкілдерінің терезесі тең, мүдде-мақсаты бір. Олардың еркін еңбектенуіне, білім алып, кәсіппен шұғылдануына бар жағдай жасалған. Тіптен, өзге этнос өкілдері өз ана тілдерінде оқып, салт-дәстүрін дәріптеп жүр. Құшағы ыстық, құлашы кең, байтақ өлкеде тұратын біз бақыттымыз!

Айымжан ЖАКЕШОВА,
М.Әуезов атындағы
ОҚУ «Басқару және
бизнес» жоғары
мектебі, «Экономика»
кафедрасының
оқытушысы,
э.ғ.к., профессор